



17. august 2010

Inatsisartut suleriaasianni § 36 imm. 2 naapertorlugu Naalakkersuisunut apeqqut imaattoq matumuuna saqqummiuppara:

Naalakkersuisunut apeqqut:

1. **Kalaallit ilinniartut atugaat pillugit misissuinissamik Inatsisartunit FM2010/156-ip akuersissutigineqarneratigut Naalakkersuisunut peqqussutigineqartoq suliaq sumut killippa?**
2. **Ilinniartut kattuffii qanoq misissuinermi akuutinneqartigippat?**
3. **ilinniarfinni (maani nunatsinni nunanilu allaniittuni) misilittagarineqartut qanoq annertutigisumik misissuinermi akuutinneqartigippat?**
4. **Naalakkersuisut maanna killiffimmi nalunaarutigereersinnaanerlugu misissuinerup inernerisinnaasai qanoq isikkoqarnersut?**
5. **Naalakkersuisut misissuinissami qanoq ilusilersuippat, suullu misissuinissami tungavigineqarpat?**
6. **Naalakkersuisut oqaatigisinnaanerlugu ilinniartut ilaannai immaqaluunniit ilinniartut tamakkerlutik (maani nunatsinni nunanilu allani ilinniartut) misissuinermi ilaatinneqarnersut?**
7. **Naalakkersuisut oqaatigisinnaanerlugu Danmark-imi ilinniartut saniatigut misilittakkat periarfissaanersoq ilanngutissallugit? Uani pineqarlutik Kalaallit ilinniartut Islandimi, Norgemi nunanilu allani ilanngunneqarsimanersut?**

(Inatsisartuni ilaasortaq Aleqa Hammond, Siumut)

Tungavilersuutit:

Upernaakkut 2010-mi Inatsisartut katersuunneranni ataatsimiititaliap isumaqatigiittup innersuussuteqarneratigut akuersissutigineqarpoq Naalakkersuisut misissuitinneqassasut, tassani qulaajarneqassallutik nunatsinni nunanilu allani ilinniartut inuuniarnermikkut atugaat. Misissuinissami siunertarineqarpoq Kalaallit ilinniartut atugaasa nalimmassaavigineqarnissaat pitsangorsaavigineqarnissaallu, ilinniakkap sumi ingerlanneqarnera apeqqutaatinnagu.

Misissuinerup ineneri pissangallunga minnerunngitsumillu Kalaallit ilinniartut annertuumik naatsorsuuteqartut pillugit utaqqivunga. Ilinniartummi nunatta siunissarai.

piumasaraara apeqqutit ullut suliffiusut qulit iluanni akineqareersimanissaat.